

四庫全書

集部

欽定四庫全書

集部

石倉歷代詩選卷二百八十五

今十一

詳校官庶吉士臣龍建槐

侍讀臣孫球覆勘

總校官進士臣朱鈐

校對官中書臣范來宗

謄錄監生臣龐兆懋

欽定四庫全書

石倉歷代詩選卷二百八十八

明 曹學佺 編

明詩初集八

劉崧

門有車馬客

門有車馬客光彩一何都
謂從天上來意氣傾萬夫
銀鞍耀流星丹轂夾華月
白馬驕且馳浮雲遮明滅
鳴鞘

赴咸陽執戟趨承明二十事征戰三十成功名出護塞
上軍入典禁中直五侯與七貴調笑同出入相如早還
蜀季子終相秦如何衡門士抱膝長苦辛

將進酒

高堂帝帳圍暖烟繁絃急管喧兩筵主人敬客奉觴酒
再拜客前百千壽玻瓈鴨綠鶯乳黃紫檀夜壓松花香
吳姬窈窕解歌舞眉黛嬌春凝煖光古來豪傑重然諾
意氣相傾等山嶽腰間自有雙吳鉤換酒醉君君莫愁

東方行

東方閃閃啼早鴉美人愁眠隔窓紗桐華樹下人來往
銀牀轆轤夢中響

鳳笙曲

洪水蕩八極丹霞標五城仙人從東來邀我吹鳳笙鳳
凰雙飛錦翼明三十六管排崢嶸長風卷入碧雲裏仙
仗忽擁千霓旌六龍騁駕若木晴仙樂沓奏天中京雙
成起舞韓衆聽此曲侶是升天行天門窈窕九陞平聞

有雷鼓相砰鉤手招仙人馭奇氣乃是山中龍虎精張
公鍊丹金液成洞門石室餘秋聲雲中仙駕如可待願
逐盧敖遊太清

照鏡曲

蟠螭雙銜錦帶紅粧臺刻玉秋玲瓏綵雲忽開紫鸞舞
明月夜墮香奩中美人粧罷房櫳杳鸚鵡呼寒帳中曉
拍簾花迎笑靨開低飛黛綠秋娥小滿庭桃李各嬌春
顧影含羞便惱人愁來獨掩雲屏宿手持寶釵扣寒玉

吳綿蜀粉暗消磨淚滿菱花奈別何不知昨夜愁深淺
但覺朝來華髮多

古離別

天蒼蒼地靡靡東西相距幾萬里日月來往朝夕間遊
子一去何當還羅衣血淚紅斑斑芳塵掩鏡愁朱顏昔
時送別長安道幾見春風蕩芳草金鞍錦韉不可期紫
燕黃鸝坐中老知君自有心賤妾空自憐一束錦字書
何能到君邊海中珊瑚泥底藕不見青天終不朽

江南弄

江浦晴雲作水流，鴛鴦啼雛花滿頭。
沙堤十里寒溘溘，湘娥踏縵搖春愁。
菖蒲葉齊寶刀綠，珮魚雙煎琪花玉。
酸風吹雨不見人，一夜啼痕繡叢竹。

長相思

長相思乃在青天之外，碧海之湄。
我欲見之，望不極，側身太息涕漣漣。
昔與君別者，驅車臨路岐。
車塵向南起，迴風吹滅之。
君行遙遙邈，不可持。
含悲蓄憤鬱其累累。

瞻彼出月弦望有時乃靡朝夕如渴如飢落葉飄颻寧
返枝東流之水無還期重華一去萬里絕湘江秋竹何
離離寧為懊惱曲莫奏長相思思長意遠君不知妾心
所陳多苦辭

烏夜啼贈友人別

華燈張筵促弦急隔簾霜落風吹入琴中彈得烏夜啼
啼聲夜寒高復低林鳥何來飛撥刺夜半啞啞聲不歇
姑蘇城上拂黃雲銅雀枝邊繞明月行漸遠聲漸稀揚

綵各自東西飛東邊日中有伴侶看汝飛鳴日邊去

題唐子華江居平遠圖

宛其長洲在彼中流上列灌木旁引高丘彼君子居于
林之右言敞東軒緬覲平岫盤石在渚叢蔭在門有風
夏涼維日冬溫豈無方舟可以遊釣言曳其杖於焉遐
眺油油行雲靡靡逝波歲既晏矣云如之何鳥鳴于谷
魚麗于罍君子之居君子之友

題蘭

山則有石谷則有蘭我思美人茲之永嘆
奕奕翠羽翹翹紫莛何以求之山阿水涯
迴風猗猗白石皜皜山中無人念此芳草
深林之幽式聞其香安得佩之蓉裾芰裳

題山雲居圖為樊都事仲郭賦

我居何所南山之下油油者雲窈窕其阻衡門在阿翳
彼嘉林上有鳴鳥懷之好音良晨載興游睇川沚榛湧
邇綿有客戾止琴瑟在庭清樽載羅掃地布席援絃咏

歌我歌我酌白雲在谷聊可為娛孰云不足雲之升矣
風或颺之曾于是處而忘世為淒其淪矣雨亦濡只羣
生烝烝澤施曷已雲斂而舒山高以深彼君子兮悠悠
我心

古詩奉寄徐南卿鄒致和二賢良

涼風吹庭樹撼撼鳴未已中宵起彷徨所思在君子君
子昔言別二月柳始青柳今成枯枝白露泣以零合并
良獨難日月行當晚自非木石心誰得不懷遠

其二

攜書出重門擬寄南飛翼書中有深情不道長相憶相
憶不相見思攀芳桂枝人言道路遠持此將安之豈無
清夜夢東渡章江水水深愁復迷一夕思千里

其三

長林何逶迤下蔭清溪流芳茗戒墮露黃鳥復鳴秋遠
色正蒼蒼衆木一何稠星垂水面白雲落岩口幽思得
良友晤可以汎方舟

其四

巖巖山陰竹結根廣庭阿密雪掩茂葉微風振纖柯秀
色正周列繁陰亦旁羅君子抱幽素終然葆真和熒熒
澗底花靡靡園中莎及時詎不榮晏歲當如何

次王子啓夜坐懷曠伯達

褰帷惜良夜起坐臨清池窈窕月奩合逶迤雲佩垂虫
響初寒候烏啼欲曙時况復念良友遲回勞所思

桃源

青林被重岡蒼石立絕磳冥冥松風迴高蔓弱可綰驅
車鶴嶺下沮洳濕危棧微茫烟霞集披靡杉筠間高秋
灝氣豁秀色紛屬盼芸芸澣續子涉水恒及胥山女行
負薪結髮垂兩朮年豐稔稻足食狙芻與豢呼吏不及
門征租少稽慢銀坑重茶賦往往先月辦緣山八九家
大耕習薊鋤土屋桑樹高雞鳴日方晏清霜落原菽夕
露沾畦覓吁嗟避秦人歷世乃多患豈知太平俗鎧甲
未嘗擢永宜曠士懷樂此謝游宦

苦熱

高館悶煩歎蹙蹙思一騁葉定風乍稀蟬鳴晝方永西
偏梧桐樹疎薄不布影移牀坐嘆息仰見繡谷嶺汗滋
苦流踝髮短厭垂領黃葛秋未成烏帽時一整遐思翠
竹林下蔭青苔井脩綆絡銅鉗時來漱清冷

題高人汎舟圖為鐵柱左煉師賦

刺篙度迴渚解帶會微風仰視青天高浩歌秋水中滄
江渺空碧嘉樹發霜紅玄境有至樂伊人若鳬翁遐思

青玉佩應過紫霞宮

過南訓訪友同王子與羅子理分韻得滿字

連阜行平臯深林闕虛館揚襟暢遐思散帙延清款
溪萼花翼翼田黍實纂纂逕迴阡彌永水落澗初滿
載欣秋稼登矧愜人事罕欲往悲曠途言歸理脩曠

貧居二首

種瓜若不實閒草各已花抱鋤恣朝飮對之以長嗟
蓬門晝長掩游釜亦有蝸破屋乃無茆雨來安可遮
聊持

手中卷展玩至日斜榮枯與得喪來往寧有涯悠然達
其會憂戚焉能加

又

種麥在高丘丘長草生滿秋餘乃無雨秀色遂枯短朝
行壠間蹊暮息林下曠荷鋤待春風時至諒不遠東鄰
桃李花終歲實纂纂生理寧獨艱如何樂疎散

歲暮南歸留別蕭紳諸友

旅寐不能旦披衣坐牀帷屋角曉色動鳥鳴已多時起

坐出庭際雲物正華滋殘雪未盡消羣山鬱參差即此
念故園焉得不懷思宜曰無尊酒足以懽相持矧屬歲
運周返駕固其宜理策望前路揖君從此辭窮簷有稚
子但訝歸來遲

登北岩眺望因投巨石宛轉為戲

自愛北岩秀緣雲窮翠微迴見大江流獨立一振衣崖
表人迹絕燒餘寒草稀繞澗聆暗泉攀蘿憩危磯投石
轉陰壑霆擊星火飛奇探恣游行興愜忘嶮崎日暝思

金匱先生集卷之八
更尋逍遙望月歸

陪陳尹飲江上雨過夜歸明日賦此

渡江雲斷橋把酒風振袂芳園遂幽尋良友適遠至諧
談且云懽酬勸忽已醉一雨洗塵襟千山拂涼翠柘林既
迴薄蘭渚復延企月轉城東門蕭蕭送歸騎

題春山樓觀圖

川光媚春陽岩溜含夕響林花間欲飛江草暗方長迢
遞樓觀陰峰迴見仙掌

題筠軒

脩竹夏向深層軒晝逾靜沈沈幽蔭交洒洒衆綠淨微
風枕簟入落日琴尊並攬枝發清嘯撫節延孤咏悵望
生夕霏幽期在蘿逕

夏日同歐陽仲元羅子理鄧崇志會飲林屋得
紫字

幽居帶林皋烟草共墟里兩日不相承鳥啼春竹紫川
平雨初集日落風更起悵望城市遙青山隔流水

題吳氏宗夏所作秋林高館圖

江皋秋氣澄林屋帶幽篁霜餘羣木斂日落衆山靜
澈舟泛葉湛湛水涵鏡歸鳥愁暝啼飛鴻淡遙映市朝
從茲遠輪鞅焉得競釣懷渭濱叟耕憶谷口鄭彼美孰
與期援琴發孤咏

戲題訪戴圖

大雪滿天地高興何悠哉終然不相見獨棹月中回人
言越溪春酒熟山花開此時風日好何事不能來

送樓徵士叔真歸金華曾侍郎邀賦

祖帳出都門，鴉啼掖垣曙。
春從天上歸，人望山中去。
離亭烟柳變，極浦風帆暮。
亦欲把蘿衣，空傷別瓊樹。

題秋江待渡圖為蕭學士賦

小航衝風岸，將及行人下。
馬沙頭立，水澗雲深野。
渡閒天寒日暮歸，心急人生行役安。
可休到江路盡，還通舟誰能累足山中老，不識風波一日愁。

題堵炳所畫扇面山水為李鴻漸賦

紫崖碧嶂連雲樹白石青莎並江路采樵客去洞門深
出郭人歸烟水暮兩崖之間高且虛有亭翼然誰所居
山花當戶可載酒芳草滿庭宜讀書

漁家樂題漁樂圖為魯朝佐郎中賦

漁家樂船裏為家無土著朝朝日日大江邊長江短汊
從灣泊醉眠飽食托烟波却笑傍人事耕作月明篷上
蘆花飛雨打船頭楓葉落蘆花飛出水鰕魚秋正肥侵
晨相喚提網去薄暮放歌收釣歸夫妻白首長相聚有

脚何曾踏山路教兒打網莫種田長江有水無荒年

三峯樵者歌為宗原張員外賦

若有樵者清且閒遊棲乃在三峰山雨餘濯足深澗底
日高伐木喬林間人生出處若雲變買臣會稽君不見
祇今懷綬作員郎却望三峰思故鄉

題山水畫

小山削玉搏空青大山錯繡開帷屏劃然千丈崖壁立
下有流水當高亭亭中幽人顏色好城市何年迹如掃

長江日落澹浮雲極浦春回滿芳草深林窈窕仙路遙
谷口雪明雙板橋便攜綠玉上絕頂閒聽松風吹洞簫

次周所安寄短歌

周郎春興醺如酒繞屋陂塘種楊柳憶曾相過賞東風
手引流霞斟北斗當時不省生遠愁花下起舞回高秋
長松挂月出石嶺清夜醉倒東溪頭別來幾度秋風發
却怪音書望中絕行人馬上念鄉關九月居庸洒飛雪
羨君一門如棗花石室舊藏書五車昨來寄我三百字

字墨矯矯猶翻鴉我漸衰邁成漂泊釣水耕山負前約
山林嘯傲日方長慎勿白首悲馮唐

題秋色平遠圖贈王孟謙歸四明

我家住在澄江畔村北村南去山遠春風桑柘連麥畦
秋雨菰蒲隔松坂幾回欲起看山樓未成忽作神京遊
至今夢落珠浦曲如見秀色天中浮昨來驅馬趨燕北
霜草風沙總悽惻汪郎為寫平遠圖恍似江南帶秋色
橫坡斷岸相灣碕危石臨水如蹲犀松陰二客茅屋底

無乃相對方吟詩我欲呼之從此起便踏漁舟弄烟水
月明吹簫下平川卧看青天千萬里情不得遂將奈何
忽復秋霜雙髻歸田已知生計晚濫祿頗覺憂慮多
君歸四明滄海上惜別臨圖倍惆悵他年載酒看荷花
賀鑑湖邊定相訪

磨劍歌

我行四方如飄風袖有古劍蒼精龍何年塵土凝不滅
苔花繡澁青芙蓉往者提攜訪嵩嶽手抉飛泉向空落

劃然掣斷青絲懸直恐乘流遂騰躍青天白日交風霆
我方赤手試發劖陰紋差差吐寒月碧縵隱隱排疎星
搖拽千仞崖動蕩九澤水腥浪迴天倒海流陽侯夜哭
魚龍死歸來麗黻青玉函紫雲為束黃金絨不願輕污
佞臣血千年萬年保冰雪

所思曲寄曠伯達

我所思兮西山之美人愛而不見勞我心美人娟娟隔
雲林昔別遺我雙南金東風吹行雲飄忽在遠道綠髮

青蛾眉念此顏色好秋風八月芙蓉開憶君寄書南浦
來芙蓉寒死十月露復忽寄書重相催我行十八灘灘
水流浩浩青天急雪亂迴風白日驚雷撼崇島上有嫋
嫋之綠蘿下有汎汎之迴波玄猿暝啼江月出獨不見
之愁奈何愁奈何風蕭蕭山中歲晏不可以遠招鴈鴻
茫茫隔烟水楊柳颯颯悲河橋願攜雙綺羅贈此遠別
者新愁渺如霧千里不得寫早晚下南津預將書報君
江空日暮不可見望望西山多白雲

織女吟贈黃進賢

憶昔束髮初嬌倚雲錦機折花事戲劇笑詫身上衣一
從十五時學向機中織絲短愁苦長梭緩心轉急永夜
蘭燈懸洞房門前桐葉零秋霜霜寒手凍絲緒亂絡緯
悲啼金井牀春花更疊黃金縷花底青鸞蹴烟霧東風
何日天上來擬奉君王宴歌舞十日滿匹恒苦遲一夕
停梭生網絲持刀沈吟剪秋水粉泪欲落愁風吹遠懷
素心人邈在千里道何因托交歡持此永相保東鄰小

姬昔同年至今盛飾為母憐幾回月高明杼柚正是他
家夜彈曲

送焦廷璋之洪

玄冬山谷寒崔嵬北風吹雪從天來居人屏縮不出戶
子有遠行良苦哉道路蒼茫歲云暮甚欲留君不能住
仙槎江口石潭深南望不見青楓樹送行却過東城頭
更上橋西沽酒樓樓前無數白雲闕磊落如對三神州
當歌置酒忽不樂少小無成總蕭索長轅短棹日紛紜

山雨江雲謾如昨聞昔爾祖出牧時我家大父而翁師
清尊畫戟照白髮二老風流如見之舊家文物今何在
霜露荒荒歲年改珠林孫子真可憐羨爾承宗振光采
君家巷北我巷南古藤秋樹寒交參賤貧奔走少相聚
摠有至樂何由堪昨者誦君新句好於我還能慰枯槁
雪消南浦梅樓高憶爾離愁滿秋草

寄贈張隱君

仙人身著紫綺裘昨者來自南陵州南陵之山高百尺

中有疊嶂之危樓烟光湧翠當碧落石瀑飛嶂鳴清秋
庾公謝眺招不起至今山水令人愁飄然戲笙鶴南過
三湘去落日下洞庭長歌攬巫楚楚王臺榭杳靄間青
鳥飛去何時還三十六天朱陵洞七十二峰南岳山娟
娟綠蘿裳嫋嫋臨流女倏忽如飄風白波愁日暮重華
之琴不復鼓靈瑟年年泣秋雨仙人自是留侯徒口誦
黃石相傳書左按鈞天之廣樂右接竒肱之飛車魚龍
掀舞明月下坐使千古成須臾我思仙人碧雲裏再拜

揚言慚仰視瑶草春香石洞霞白榆夜浸天河水天河水
水流無盡時織女秋髮應成絲若過扶桑定相待我欲
乘槎浮東海

題唐子華江干幽居圖為余子芳賦

山風不作衆壑靜江雨初飛入寒暝綠浦迢迢碧草交
丹崖窈窕青林並金牛石前螺子岡子行何時歸故鄉
野航把釣秋水迥江亭讀書春晝長

題平川雪霽圖為張用可縣丞賦

南天北風暗吹雪川上遙峰互明滅雲陰欲墮曉光迷
河流不動層冰結魚龍下蟄深澤冷鴻鴈啼饑眼流血
千村萬落連蒼莽驚沙枯樹相淒切行人稍出皺手足
悵望林居總愁絕我家邈在武山東屋前石岸多青楓
野橋渡溪沙路遠皆與此圖風景同窮年念此政欲返
寒色恍入虛庭中長鑱剷藥崖谷滑短褐負薪環堵空
閉門且爾暫投息會見日出光曠曠

題楊奇琛所藏山水圖歌

我本白雲人愛住青山下五嶽尋幽未憶歸川崖歷壑
窮秋夏曾看絕壁明高霞秀色照耀金蓮花洞前遠訪
丹泉井谷口時逢白鹿車鹿車東渡溪流淺瑤草春香
綠如剪海門日出天雞鳴手接飛蘿上層巘是時笙鶴
從天來徑欲浮海觀蓬萊雲路微茫波浪濶使我嘆息
空徘徊十年汨沒塵埃裏却看丹青心獨喜問君何處
得此圖髣髴林壑烟霧起雖無秀絕凌衡岷點染亦復
窮其真深林脩竹草亭靜似是水邊修禊人蒼苔白石

臨流路亦欲相呼抱琴去晴天指點北飛鴻應識雲中舊行處

題紈扇畫景贈易茂才

故人高興蟠雲林門對三山之碧岑却憶秋風相過日
溪口繫船黃葉深石潭買魚雨暮暮松岡躍馬烟沈沈
翠屏千丈天上落十日縹緲窮登臨當時感激戀岑寂
常恐寇盜相陵侵落霞遙憐烽火赤白雲獨擁高崖陰
忽復山城五月暑思挹風露清煩襟偶持紈扇寫秋樹

已覺幽思迴蕭森天清遙見寒澤鴈日落如聞秋岸砧
寄君重寫千里意感我昔別多愁心交交林間雙鳴禽
臨風忽來遺好音青松白石可娛老從爾唱和山中吟
題沙村江樓歌為劉方東賦

朝遊雲亭夕憩鳳岡河水浩浩山蒼蒼白虹東來盤九
曲日出霞明見秋綠雕甍碧瓦歛飛翻百尺層樓起林
麓樓中仙人烏角巾調笑日與雲山親滿筵歌舞客如
霧中有萬斛江南春昨來登臨九月暮落鴈橫江隱霜

樹錦袍夜冷燭光殘北斗歌斜挂瓊戶我欲援君綠綺
琴為君一鼓清愁心白沙翠竹自江路金谷銅駝非故
林吁嗟昔賢困羈旅仲宣能賦終懷土何如對此日高
歌手挽松蘿看烟雨東南射虎日紛紛幾時書劍罷從
軍驚鼻峰頭望明月雞棲潭上釣寒雲

贈吳生九成

吳郎去亂八載強求友讀書心不忘偶臨白鷺看流水
却望紫鱗思故鄉故鄉湘南百餘里明月千村照荆杞

石橋山北多園田
花開會見歸來年

賦澄江贈友人別

澄江之水清如油
春瀾漫漫光欲流
微風忽動白鷗渚
明月正上金魚洲
洲前美人採舟發
起唱吳歌踏江月
別愁深淺君自知
江流不斷長相思

風箏曲

緝麻合線長百丈
要繫風箏待晴放
有風須及清明前
作得鮎魚愛新樣
全身糊紙竹縛匡
兩旗橫張垂尾長

手中緩放莫教卷風力漸舒飛漸遠猶嫌平隴去不高
走上山頭如掣鼉盤空一點正搖曳欲墮更舉何滔滔
時人勿用旁驚睨質薄材輕等兒戲乘時容易上雲霄
失勢終然在平地明日落花花雨寒過却清明風力闌
蕭條斷線挂虛壁溝中破紙無人拾

題進馬圖

拳毛赤騮初來進西人自控中官引虎氣深騰紫禁門
龍光暗掣青絲絢玉鞭金鐙調馬時天子親御和鸞宜

香街十二柳如霧太液宮前花滿枝神物飛騰那可測
電掃風馳周四極時來顧影只長嘶太僕圉人騎不得

題華陽彭玄明所畫秋山圖

我不識華陽彭煉師見畫雲山想句曲數峰暝色入遙
浦六月泉聲動虛谷紫霞樓觀當落日似有幡幢出林
木海邊黿首戴雲紅天際蛾眉拂秋綠昔聞天台鴈蕩
相鈎連雲氣來往駕飛仙斷橋溪澗路如棘嗟爾策蹇
歸何年秋風湖曲波如烟我思東泛吳江船買魚沽酒

綠荷渚吹笛夜下松門前便尋煉師覓玄鶴却訪華陽
窺洞天

題桃花珍禽圖

山桃花開紅滿枝珍禽啄花光陸離嬝嬝欲立不自持
吳堤十里錦作帷憶曾半醉倒接羅走馬挾彈歸來時
還見踏翻紅雲飛

出蒲嶺晚投鍾寨

亂石闕岩扃蒼烟擁翠屏稻田宜晚赤山木自冬青客

去衝蠻霧人來覩使星祇慚過冀北猶擬泛滄溟

題李時畫山水圖寄贈羅脩已

雪擁蓮花嶂霞明楓樹林江侵沙冀濶泉落洞門深
柳色催移棹松陰帶抱琴新亭無限好何日共登臨

清明對酒

榆火報清明雲天霽景澄菱花愁夜雨桑葉愛春晴
燕說興亡恨蛙占水旱聲可能忘世慮呼酒聽流鶯

和蕭用文寒夜聞風之作

洶洶松濤合潺潺竹溜分已憐寒夜入况是客窓聞月
黑烏號子天高鴈失羣淒涼江海意對酒正思君

寒夜感興和廖子所

浦月初沈後林霜欲下時空餘清夜永不盡故園思旅
鴈驚寒慘鄰雞戒曉遲牀帷憐稚子此意未能知

過王氏南園看竹劉以和攜酒至共酌林間

禁得南園筍新成數百竿何年通一徑長有客來看露
葉沾重席烟梢拂小冠風湍聽不定况復近江干

又

磊磊蒼苔石娟娟翠篠林
園畦分曉色鄰屋借秋陰
日轉遊絲細天寒聚雀深
獨無三畝地種汝伴清吟

舟夜次查口東蕭鵬舉

扁舟汎綠嶼雙櫓折蒼波
秋氣水邊早月明江上多
魚龍今夜冷鴻鴈幾時過
去住闕幽興歎眠聽棹歌

題山水小景

倚石羣松秀橫江五柳繁
水侵陶令宅山掩謝公村
浴

鷺依晴槩啼鶯近晚尊亂餘寧復此展卷一消魂

雷鳴磬上對雪

誰能思更往暝入楚江空捲席聽春雪移船避朔風依
人汀草綠著意渚桃紅觸景成孤寂悠悠去住同

黃坊

風色愁將夕離人欲斷魂雲深疑積水烟淡識孤村釣
艇遙相並沙鷗故不喧忽思攜稚子踏雪過南園

遊臨溪寺和鍾學正韻

澗遶西流水門臨北向山渡橋驚鳥散掃石愛僧閒霧
薄林花紫春深石笋斑雲峰如可問杖策未須還

初遊長興寺

一路縈紆入羣峰迤邐開樹連山路合溪帶石橋回烟
火依農屋雲霞隱佛臺如何千載下不見有人來

宣溪餞李提舉一初席中和王子讓

客有東歸思維舟向浦橋江聲翻石面雲氣閣岩腰悵
飲淹泥潦歸程問野樵醜歌莫催發晴景在朝朝

送李敬之赴廣西帥府

帥府西開控百蠻故人捧檄上遙關
春回桂海雲垂地夜入榆溪月滿山
客路獨行青嶂外人家多在白雲間
南征定有詩千首憑寄秋來驛使還

題畫松

巫峽荆門不可尋坐憐孤嶂動雲林
夜寒或與蛟龍鬪秋暝應聞虎豹吟
千歲茯苓山下老一時絲蔓雨中深
野橋寂寞雲根冷最憶停驂弄晚陰

題快閣

快閣西南引興長
高城落日晚蒼涼
江通牛吼疑巴峽
山入龍門似太行
季子敝裘終相國
長卿駟馬未還鄉
登臨日對芳樽酒
莫遣秋風近綠楊

送周德剛歸九江并柬其兄仲常

君家伯仲才名盛
賤子東南道路窮
往昔永懷千里別
祇今謾想一尊同
蒼葭水驛青鳬雨
落木山城白鴈風
歲晏林居定相憶
九江消息若為通

寄范實夫

細雨柴門生遠愁
向來詩帙若為酬
林花落處頻中酒
海燕飛時獨倚樓
北郭晚晴山更遠
南塘春盡水爭流
可能相別還相憶
莫遣楊花笑白頭

舒君彥許送菊未至

故人許送南園菊
可趁重陽十日開
謾擬客窓能暫醒
豈緣秋雨故遲來
山含霧氣通書幌
雲湧川光落酒盃
寂寞西齋林下路
新詩惆悵為君裁

五月十日雨讌集周氏亭子適溪水暴至不得
歸因留夜宴樂甚後數日叔用將之豫章次
韻贈答且以識感也

楊柳河橋維客舟送君此去憶重遊青霄雙闕連雲起
五月滄江帶雪流嶺外簡書前日至湘南兵革幾時收
羈懷早已無聊賴憑寄新詩過石頭

晚興

高館沈沈當翠微晚涼幽興莫相違亂螢出草光不定

金分月八
卷二百八十八
獨鳥度溪風乍稀北港泉聲喧野碓東家月色淨柴扉
遙憐兒女當窓小憶我經年行未歸

寄贈盱江郡教劉公稷

十年不見劉文學白髮新來幾許長官舍曉晴槐葉暗
泮林春雨杏花香聽泉定過麻姑洞看月還尋華子岡
山屐酒壺從倒載昔賢高詠故難忘

贈別屈悠然歸豫章

雲松軒館淨林扉十日尋幽且未歸坐對清秋桑落酒

行寨高樹薛蘿衣石欄度曲涼風動竹屋吹燈夕漏稀
自是使君能好客故人何事苦相違

登鬱孤臺

石面層灘似虎牢盤渦東峽見周遭背城二水合流遠
隔岸五峰相對高神闕紫烟樓鶴雀浮梁白日偃鯨鰲
來遊最愛西洲上千樹東風散碧桃

題山水畫

山岡盤盤多樹林江水湛湛愁人心赤雲樓觀落日外

白石溪澗長松陰啼猿虛疑近翠壁飛鳥劃恐迴高岑
野亭春色苦無賴忽憶故人思速尋

題引翠樓柬張元善

盡道樓居思不羣滿樓山色翠紛紛高崖斜日含丹霧
碧嶂清秋起暮雲江上捲簾通雨氣月中看劍動星文
來遊定覓張公子載酒題詩過夜分

贈董宗文歸省樂安

董生讀書赤嶺西尋常閉戶足幽棲雲中沙鴈驚寒落

江上野禽愁暝啼親養何由沾祿秩旅遊終日愧塗泥
老翁望子行不至日日看雲攜杖藜

贈魏伯諒歸豫章

十月清霜逐鴈飛旅遊空復嘆多違野林寒色催黃落
石屋秋陰近翠微聚散總怜今日異登臨徒感故人稀
將軍宴客偏愁別更換歌辭看舞衣

贈慧上人

仙槎江口槎溪寺幾度停舟訪未能頗恨頻年為遠客

喜從他郡識高僧雲霞色映禪房衲星月光涵古殿燈
何日却飛真錫返故山蒼木翳寒藤

送何天碧歸龍虎山

道人九月江東去二十四岩烟霧深落日橫峰看鴈度
清霜碧樹聽猿吟山中紫朮堪為酒竈底丹砂可化金
淮海風塵愁復別重尋還許托雲林

畚王孟極過訪荷山書館不遇之作

王氏才華擅世傳臨深文物故依然山中夜雪明書帙

溪上春雲壓釣船，深巷鳥啼花似雨。平原人去草如烟，荷峰亭館能來數。悵望高車落照邊。

題珠林江口謝公廟與曠伯達同賦

倒石源頭野廟開，亂餘臨眺獨興哀。晚山隔岸雲霞出，秋水滿江鳬鴈來。王氣已消陳帝壘，客愁長遶越王臺。烽烟西北猶傳警，擊節酣歌首獨回。

奉和李府判行善九日遊三華山

仙居遠在三華頂，使節真成九日遊。別洞幡幢通上界，

金匱山房集
卷二十八
亂山烽火隔南州。雕弓隱月啼猿晚。玉帳連雲斷鴈秋。
聞說岩扉題句後。綵霞長護殿西頭。

題草堂

胡君舊宅龍江上。五月清風一草堂。霧隱松蘿分曉蔭。
雨翻蘭杜浥秋香。連峰當戶明書幌。流水交渠映筆牀。
此日從公趨幕府。能忘高咏向滄浪。

承練教授伯上由南岡市出州途中有作寄

示依韻奉賦

龍州春浪綠逶迤腸斷行人欲發時芳草獨當沙際出
閒花偏向雨中宜極知庾信詩能賦謾笑劉伶鍾自隨
寂寞珠林舊茅屋可能維楫赴幽期

寄謝同遊諸子

草滿柴門晝不開喜聞維棹故人來江頭送酒穿林竹
寺裏題詩破石苔斜日鳬鷺寒影亂斷雲鴻鵠暮聲哀
蕭閒自極登臨興飛蓋南溪莫謾催

奉答王希顏秣塘山中寄示之作

鳥啼林館落花深
長羨閒居物外心
老去鹿門尋舊隱
愁來巴里足新音
鏡中白髮霜初破
帳裏清燈月共臨
寄遠謾勞春興發
何時載酒出山陰

快閣僧房夜賞瓶中牡丹賦呈王使君

折得嬌紅馬上歸
天香繚亂入春衣
玉欄曉露寒初破
金谷晴雲暖欲飛
宴罷最宜燈下見
亂餘應恠草間稀
洛陽池館今何似
似誰念題詩送落暉

題山水畫

江上青山山外峰水邊亭榭記行蹤
天垂瀑布青雲斷日射滄波紫霧重
松掩鶴巢翻薜荔柳歌漁艇並芙蓉
抱琴已嘆歸來晚何事幽人獨不逢

過沙村聞思菴因記往年孫理問奉叅政全公檄
命駐兵山中招徠東南之負固者時余客軍
中留劉君方東所常從孫侯遊菴中溪山不
殊風塵方張懷念今昔因賦詩柬劉併識余思
故人孫宰憶同遊躍馬分麾駐上頭
塞外旌旂非舊日

金匱山房詩集 卷二十八
山中鐘磬自清秋。雲松暝合侵崖徑。霜葉寒飛撲澗流。
滿眼風塵愁更住。為君惆悵獨登樓。

入城

江水依然抱石磯。獨行空感舊遊非。晚山當戶日初落。
秋草滿城人未歸。田鼠引羣穿井出。山雞求食傍簷飛。
向來車馬東門路。忽憶朋遊汨滿衣。

和彭伯圻由武溪寄示

惆悵溪南寄短吟。春光還共客愁深。孤舟人去江浮雨。

二月鶯啼花滿林
載酒已怜行處遠
駕車猶擬夢中尋
越王臺下東流水
不盡當時送別心

送僧惟善歸省豫章

龍門徑裏雨如烟
雲木蒼蒼叫杜鵑
江上客懷悲往事
山中草色記流年
飛花雪片沾離席
垂柳春陰拂畫船
忽憶鍾陵烽火後
湖東水長浸瓜田

九日卧病戲柬王伯衢

重陽獨卧高齋雨
此日兼懷故里秋
滿眼菊花愁共把

多情藥物慰相求
江湖又報兵戈合
田野何由瘴癘收
聞說西樓賓客盛
昨朝攜酒上牛頭

水口田家

水口山腰三四家
楓林茅屋帶蒼葭
野人敲火夜然竹
溪女踏雲朝浣紗
水落寒潭魚可捕
草肥秋壠兔堪置
有時刀槩還登砦
雞犬蕭蕭隔暮霞

喜家僮至

西行幾日離柴扉
還說來時燕子飛
日射水田禾葉暗

雨浮山壠豆花肥池魚吹水春萍薄野鳥窺巢夏巢稀
早晚歸來酒應熟相攜稚子笑牽衣

八月十五夜承夏仲寅停舟邀飲江上有作和韻
斷岸荒榛一片秋駐帆感子意綢繆幾家明月窺瑤席
此夜清風動綵舟桂影拂雲通海色角聲如雨說邊愁
多情共對金陵酒腸斷他年獨倚樓

奉和彭伯圻過流江相尋不遇之作

十年江海舊相知何事重逢竟後期亂定總知為客慣

別來惟恨寄書遲
帆開極浦雲飛處
酒醒空山月上時
聞有早梅花底約
夢回長是詠君詩

訪王子讓大村幽居借書戲題壁間

村前流水宛如環
村後荒城隱可攀
當戶雨苔雙石峻
隔江烟柳數風閒
杖藜麥隴秋霜後
尊酒茅堂夕照間
聞有古書人少見
柴門客去又長關

三月十五日陪南溪諸公載酒渡溪至山下掃墳
晴日出烟三大高
踏青相喚過東皋
亂紅點地忽飄雨

新綠滿山如湧濤幾處松間登麥飯何人地下醉香醪
若為招得浮丘伯乘月吹笙戲碧桃

正月二十二日赴容州道中

一十日春饒霽景數千里路信郵亭野花有恨何勞白
山水無名只解青殘月哀猿啼嫋嫋暮烟孤鵠去冥冥
南京三月歸期早應及聞鶯侍紫庭

寄水南劉叔和羅惠卿併古城竺西上人

故園一別向秋風無數離愁逐斷鴻鏡裏髮從今日白

尊前花憶去年紅。鹿門杳杳遺龐德。廬阜蒼蒼闕遠公。
相憶何由。謝塵鞅。暮雲愁絕大江東。

題蜀山草堂為上人賦

上人草堂風物清。祇言陽羨是青城。誰知習隱孤峰下。
猶有懷鄉萬里情。坐石翻經延月上。臨流曳杖看雲生。
幾時却汎吳江棹。來聽松門澗瀑聲。

將至東阿喜望隔河穀城諸山

一望川原蒼莽間。天低風定凍雲閒。河經南堰還歸海。

路出東阿始見山野雪漸消沙隱隱燒烟初散草斑斑
遙憐黃石遺祠在千古高明不可攀

南溪館中和荅湯生元哲

江上攜書猶昨日山中對酒又今年春來花鳥傷新詠
老去魚虫憶舊箋珠浦舟回明月夜金華劍倚白雲天
登臨不盡懷賢意指點飛鴻若個邊

過石頭岡下訪表兄蕭則善因賦一首

石頭岡下水潺潺隨母歸寧憶往還少日嬉遊今白髮

殘年悵望舊青山，碧桃溪洞春雲裡。
修竹園林夕照間，老我驅馳慚宅相。
多君深隱靜柴關。

昭君詞

承詔辭君闕，銜悲入塞城。
可憐沙上月，渾似漢宮明。

題春江垂釣圖

坐把釣魚竿，虛潭翠如瀉。
輕舟浮不動，只有松陰下。

獨坐

饑雀聚簷楹，庭虛凍色明。
松下無人跡，時聞墮雪聲。

古意二首

閒倚白玉牀，低頭看深井。
銅瓶且莫下，亂我晨粧影。

又

駐馬挽金鞭，為君彈四弦。
洛陽官道直，莫過酒樓前。

同舒伯源自雙溪口渡橋登高山望幽谷諸峯

坐石弄芳草，渡溪行翠微。
西峰月未上，獨自看雲歸。

題墨竹

娟娟青竹枝，兀兀蒼石頂。
翠袖倚深林，秋高露華冷。

峭壁蒼蒼翠色新

岩石下陰猗蘭綠如剪花發人不知秋香入苔蘚

風含翠籜娟娟淨

閒聞竹上雨疑是花間露何以遺所思秋風颯遲暮

二蕙

婉孌兩相依芳心不自違月明蒼玉珮風卷綠羅衣

題雨竹圖

恠石凝雲氣橫枝浥露香故人渺何許秋意滿瀟湘

為黃巽成題墨竹

過雨琅玕潤，凌風翡翠寒。何年滄海上，拾得斷漁竿。

題蕭與靖所藏古潭墨竹

壓地欹枝重，淋漓亂葉低。深林春雨過，似聽竹雞啼。

又

峭直餘高節，蒼寒只舊叢。暮年霜雪意，未可薄簔翁。

夜月舟行

遠林烟幕幕，宿草露涓涓。沙渚鷺初起，漁舟人未眠。

九日絕句一首依韻奉答許存札教授

臨水結幽想看山懷遠情遙怜南向鴈一一背邊城

題秋江圖為陳煉師賦

霜樹雲峰隱翠烟長風吹起鴈翩翩道人心事如秋水
看到南華第幾篇

題飛霞圖為江煉師賦

海上羣峰映紫霞五雲樓觀是仙家誰吹玉笛春風起
千樹碧桃都作花

題江虛白懸岩蘭竹

懸雲翠壁三千尺
浥露幽蘭四五花
安得乘風栽紫玉
月明吹向玉宸家

步月

乘涼步月過西鄰
草露霏微濕葛巾
一逕竹陰無犬吠
飛螢來往暗隨人

窺圃

園瓜寒蔓早離披
山藥秋藤已倒垂
小雨暗沾花下逕

閒雲深護竹間池

奉和廖教授相過不遇之作

手撚菊花歌竹枝秋光月色儘相宜如何數載西溪上
只隔芙蓉喚不知

題三笑圖

三人同笑不同心墨本流傳漫至今何似青蓮李居士
猿啼月出過東林

春日承鵬舉過余林居

想見北岩雲錦堆
野花如雪照人開
雲峰寺裏啼鶯早
定約清明載酒來

題尚仲份為陳孔碩作松岸輕舟圖

青山何處是幽居
生事深林老向疎
安得短篷仍載酒
松江雪裡釣鱸魚

題高彥敬青山白雲圖

松橋石瀨雨潺潺
杉檜陰森暮色還
誰共西樓一尊酒
白雲堆裡看青山

楊柳曲

種柳城南河水傍
常年二月好春光
晴風暖日無聊賴
只聽鶯聲也斷腸

又

金縷織成歌舞衣
年年江上惜春暉
無端心性輕離別
待得花開只解飛

春日寄李子翀

春水滿江魚子肥
春雲匝地鴈羣歸
客懷誰遣愁花雨

草色無端近竹扉

正月十九日

金魚洲下放船開
華石潭邊看雨來
愛殺南天雙白鷺
青山盡處却飛回

謾題

四郭青山處處同
客懷無計畚秋風
數家茅屋清溪上
千樹蟬聲落日中

小雨約李克正過池上

溪南雲隔數青峰別館秋光也自濃
細雨不嫌沙路濕
明朝池上看芙蓉

出溪

潺潺陂水落蒼灣行子經年且未還
千里贛江何處是
斷腸空見越王山

題竹石圖

石上晴雲故不飛蕭蕭空翠濕人衣
湘娥未解臨江佩
西望蒼梧何日歸

題青山白雲圖

石林烟霧冷冥冥一舸西風過洞庭日暮白雲飛去後
江南無數亂山青

題枯木竹石

曾聽楚人歌竹枝橫江秋靜月明時只今漂泊春風裏
綠滿南園總不知

又

平沙竹樹晚毵毵楚客維舟近峽南忽憶微雲將雨過

卷一百八十八
滿林秋色照江潭

題竹石圖贈陳仲實之南安

寫得幽窓竹石圖琅玕青碧間珊瑚明朝却度南關去
何處榕陰聽鷓鴣

君子堂夜起

風亂殘燈自掩扉夜寒遊子嘆無衣池南落盡芙蓉葉
滿地月明霜正飛

題江景畫

澗邊白石明於雪林下清風冷似秋落鴈圓沙江路轉
短篷烟雨憶曾遊

題蕭曙所藏曾同可畫水

輕濤暗浪互奔驅極浦蒼烟澹有無欲采白蘋愁日暮
一帆秋雨過南湖

松雲軒

何處飛來野鶴羣踏翻松頂翠紛紛清陰不動涼如水
自掃綠苔眠白雲

題秋江小景

秋水無波淨落暉江沙雲樹轉依微望中一片瀟湘意
無數征帆逐鴈飛

題文溪道院

桂花風定暮雲閒夜靜江聲鶴未還天上月明秋似水
時聞玉珮出松關

過柳溪道院

岸上誰家掩素扉鳥啼渾似惜春暉日斜深巷無人過

時見梨花一片飛

過江南高城訪孫景賢知事途中有作

渡江一望一咨嗟水遠田園迳路斜
多謝野人相指別
青松嶺外第三家

月落

月落荒村夢自驚隔窻人靜一燈明
狂風忽起樓西樹
聽得枯枝墮瓦聲

題秋江小景畫

美人鳴弦思瀟湘斜飛金鴈不成行夜深彈徹烏栖曲
月照寒江萬樹霜

度三華飛仙橋因憶往年同遊者

步轉危橋入紫烟曾登絕頂望飛仙五人同賞今誰在
試數重來十五年

戲題蕭子所書舍

尋山衝雨過甘溪欲訪蕭郎路轉迷閒殺門前春水綠
釣竿還在栗原西

蒼石峽中見道人菴居隔水山花盛開

蒼石峽中花藥欄舊時草屋傍岩安道人去後松橋斷
縱有花開隔水看

石塘山家

隴麥高低逕路斜小池楊柳帶人家東菑午餉柴門靜
一犬籬根卧落花

玉隆山晚望

山路初晴槲葉香青林赤磧帶橫岡玉隆山後平田少

柳下人家是石塘

題三岡寺

石橋流水帶人家
紫殿春陰閣岸沙
啼鳥數聲山雨歇
門前落盡白桐花

燈花

閉門坐待月光斜
應念行人未到家
好是客窓殘酒醒
一簾風露看燈花

重遊洞玄壇

河水西邊萬木羣三間茅屋祀真君
仙家閒靜無塵榻
自掃青苔坐白雲

題墨竹贈曾同升

朗石溪頭君故家前朝文物自清華
幾回想踏橋邊路
翠竹瀟瀟覆白沙

題明皇優戲圖

臂袒紅衫側皂冠翩跹跌舞樂初攢
笛聲一片宮前起
應說秋風蜀道難

題雨竹

滄波石面晚陰涼
翠篠娟娟過雨香
何許鷓鴣啼不斷
黃陵祠下是三湘

入高州界值雨

路入高州石逕微
紫崖崩處黑雲飛
行人初發青山下
盡折芭蕉作雨衣

過雷陽有懷永年胡倉使奉寄一絕

去年與子南京別
知領鹽倉白石場
萬里相尋不相見

獨騎官馬過雷陽

題沈子仁青山白雲圖

野橋流水亂浮花
深巷垂楊淺蔭沙
祇恨小船呼不應
隔江茅屋似吾家

歲暮戲東天英上人

殘年寄食尚天涯
風裂禪衣面撲沙
還憶故山晴雪裏
閒拖錫杖看梅花

入東平渡北關外長橋見採樵氷上者

橋跨平湖一鏡開
羣鷗欲下正徘徊
蕭蕭蘆葦層冰上
猶有樵人踏雪來

石倉歷代詩選卷二百八十八

欽定四庫全書

石倉歷代詩選卷二百八十九

明 曹學佺 編

明詩初集九

蘇伯

送王希暘編修使交趾

歷數歸真主羣方若綴旒外藩須嗣續當宁重懷柔
芝簡文彌盛茅封禮更優代言欣爾屬將指副予求輶下

層霄去真成萬里遊宮袍裁白紵廐馬出驂騑望重皇
華使名高好時候揚鞭隨越鳥祖席贈吳鉤自覺光輝
遠那知跋涉修幾旬行嶺嶠何處是交州山擁魚鱗集
江分燕尾流墮鳶從跼跼鹿自呦呦綠認枕榔浦紅
看荔子洲馬人偏好客蜃戶總能舟日上扶桑表天垂
瘴海頭昔聞銅作柱今見蜃為樓櫺葉時交墜沙虫或
暗投由來宣至德直欲被遐陬除館迎京使傾城拱道
周陪臣偵伺謹膳宰往來稠樂作聆銅鼓衣更閱具裘

珍羞羅海錯妙舞雜巴謳蕉實垂垂重柳漿盎盎浮括
囊懲惹莎澀口却扶婆事大無違禮新王實好修有陳
皆睿訓餘事及冥搜足使誠心服端非緩頰俾上方思
子切誰敢為王留別袂逢梅雨歸期指麥秋論思金馬
日頌獻碧雞不

送陳思可主簿赴進賢任

一別十五年倏忽若昏旦相逢京城中幸脫戎馬亂宦
遊我何成髣髴子已換咎連一樽酒寂寞四門館剪燭

聽寒雨話舊過夜半居然消百憂莞爾成一粲維子才
且賢文采甚煥爛起從有道徵國光方縱觀謂宜賓館
閣鴻猷藉宣贊如何奉明命鉤考親吏案黎庶乃邦本
疾痛資抑按要將遠猷敷可以小邑翫心懷簡書畏跡
逐萍梗散席掛遇順風潮生失遠岸昨夕替云盍今朝
袂還判後會復何時臨歧重嗟歎

送宋起居還金華

長揖謝宦徒還歸戒征軸眷言幽貞廬曼在仙華麓就

養望既盈考槃志亦足儲清濬昔池薤荒理舊竹蘭佩
紉春蕤荷衣製秋綠沆瀣晨三嚙彫胡晝九曝從今猿
與鶴不復怨幽獨

玄潭古劍歌

扁舟昔向玄潭過聞有古劍留巖阿欲觀躊躇復不敢
只恐開匣踴躍翻滄波此時邂逅都城裏玉質珠輝那
得比玄靈外護朱草莖赤日天中湧湖水想當旌陽初
鑄成橐籥元氣驅六丁星象失光彩白藏儲精靈不然

長纔尺又半如何照室影凌亂神光兔脫飛雪霜寶氣
龍騰貫霄漢自從斬蛟江水中濁世餘子誰能庸長伴
空山棲遁者但見白晝風雲從邇來閱歲未五十兩度
江湖寄踪跡瑤臺月夜聽吹笙金界晴空逐飛錫昔至
燕京時太平今笛石城氛祲清乃知神物等鎮圭冥漠
自有神提攜由來治忽係出處非是漂泊東復西聖明
御九有妖孽俱授首既非假道斬大蛇何用軍中撞玉
斗明朝且賦歸去來彭蠡扁舟落吾手

送曹叔溫赴淮安幙

初我識君自三山面如白玉紅頰顴平明振佩入烏府
行人指點人中仙此身萍梗隨流轉淮水東西數相見
時清事簡百不憂卮酒篇詩恣歡宴自從烟霧羈江湖
將軍無復能齊驅春鶯秋月兩寂寞尺素斷絕心煩紆
今古江南佳麗地龍虎戴瞻天子氣戔戔束帛賁丘園
濟濟衣冠若鱗萃東華邂逅式相逢蕭騷短髮驚成翁
青衫依舊陪驄馬風雨徒步追羣公過從更說舊遊好

舊遊著處生芳草沈約樓前杜宇啼西施陂上芙蓉老
京城官釀斗四千交歡安得青銅錢三嗅落花共一噓
浩歌白石看青天盍簪方喜慰疇曩摻別那堪增養養
寒潮浩蕩足秋霖木落江空欲何往紅蓮綠幙依黃堂
駕言擊楫趨山陽君才有用仍小試千將百鍊須善藏
幾年爭戰今休息鬪髀糲糊土花碧韓信祖述安在哉
但見長淮搖落日世途反覆如浮雲人生離合矧可云
天皇盛德同華勛肯使獨鶴終雞羣

郭熙關山雪霽圖

昔我北遊月在稽兼旬犯雪度雄霸千里萬里皆瑤琨
高迷丘垤低迷罅朔風烈烈塵不驚中野蕭條但桑柘
僕夫股慄面削爪身上破褐纔掩骼長途日暮行不前
回顧堪憐那忍罵前車既斷後車絕停驂獨宿道旁舍
床頭土銼鬱生薪村酒沽來敢高價卧聽樵馬斲枯菱
展轉無眠疑不夜阿翁鬢髮已星星遊子何心更遠征
昨夜客牕風雨冷寒衣收拾寄行營

周伯寧春晴江岫圖

尚書襟懷絕瀟灑
揮毫往往凌董馬
平生一筆頗自珍
數尺新圖為君寫
齊山遙接吳山青
碧波萬頃孤帆征
東風絲徧汀洲草
總是岐亭離別情
一向江南一向北
離情浩蕩嗟何極
正如江上之碧波
縱有并刀那剪得
當時已足令心愁
如今況復隔羅浮
掩圖却上高臺望
但見遠海連天流
暮歸朝出誰與侶
蜃霧蠻烟結悽楚
木綿花落鸚鵡飛
苦竹叢深鷓鴣語

送蔡思賢叅政使蜀

清晨旌節三川去今日車書萬國同
燕餞都亭來詔使停驂鄉井訪鄰翁
峯經回雁邊聲靜峽入啼猿樹影空
昭烈祠西諸葛廟秦州城北隗囂宮
神交露立蒼茫際長嘯風生感慨中
毛伯昔聞周上介隨何今見漢明公
布宣德意相如檄囊括山川太史功
河隴從茲兵不構輾轅此去路相通
庭充橘柚陳方物歌聽巴渝識土風
最是多情江漢水直隨歸楫到江東

中丞劉先生齋閣前山茶一枝並蒂因效栢梁

體

朔風剪水雨雪霏萬木蕭條凍且僵青藜丈人鈴閣傍
山茶作花紅錦香中有一枝並蒂香符彩爛若雙鴛鴦
嫣然占盡三春光皇英來自雲中央赤旗翠節雨作行
阿母笑執瑤池觴仙童雙雙吹鳳凰綵女齊綰珊瑚璫
麗色照耀青霞裳芳氣氤氳滿中堂大君尺劒定八荒
牛歸桃林馬華陽百度既貞四維張禮樂誰云謙未遑

制作直欲追虞唐
丈人今之杜與房
主臣合德真明良
朝夕左右扶維綱
餘子議論安敢當
一朝嘉惠錫后皇
乃是人文發禎祥
玉局仙子喜欲狂
更祝人文壽而康
黼黻鴻猷煥天章
嘉樹呈瑞垂無彊

贈徐季子

百金不惜布梔鞭
兩耳不解聽朱絃
人情如此亦何以
我每見之獨慨然
夫君懷寶起浙右
掉鞅觀光來日邊
夙學人言破萬卷
新裁我喜窺幾編
金莖玉露足秋爽

林花澗草爭春妍紛紛牛毛豈不多振振麟角爾固專
摘藻詞垣翻舍置採芹鄉泮仍留連所好者竿鼓者瑟
猶枘以方鑿以圓陳平羊姿若冠玉鄭生辯口如河懸
禮意殷勤日三接華貫敷歷歲九遷由來利鈍係遭遇
未必愚智殊天淵樂育菁莪亦已重況乃桑梓敢不虔
去國不賦北門什還家徑上東吳船大材小試吾竊歎
冷官不厭子乃賢謫予閱世儻四十守官太學垂五年
包羞待問成倚席畢竟兀坐寒無羶勲業空期螳附驥

俛仰却笑夢憐蛇彼哉浮榮勿復道歸歟樂事言難宣
會稽雲門最幽絕鑑湖剡水交漪漣玄猿嘯呼山近屋
白鳥明滅江接天雲間往往得靈藥月下時時聞采蓮
多暇應為曲水會乘閒便作東山眠

方壺雲山爛熳圖同胡士恭博士題

我家海嶽之畫圖乃是小米手所摹丹崖翠壁走雲氣
北連恒碣南衡廬長風中來吹不斷疑有鬼物陰卷舒
石林儵開復冥漠雷雨欲至愁黦黦分張尚覺天地窄

慘淡直與造化俱斯人一去三百載流傳筆力到方壺
舊聞仙巖二十四雲牕霧牖仙者都錦溪朝朝玉氣合
瓊林夜夜丹光噓方壺揮毫托真趣生紙染出纔尺餘
天高不見青鳥下樹老仍有玄猿呼上清羽士欣入手
珍重不減千明珠展觀使我長太息如此雲山何處無
武陵桃花春正開淮南桂樹秋不枯強顏笑傲金馬署
嗟我豈是東方徒乞歸何幸優詔許遠遊便以雲為車
蒼梧既酹虞帝墓會稽更探神禹書左攀東海若木枝

右折西華青芙蓉尋真徑度弱水去飛行安用邛杖扶
豈無清冷可洗耳亦有沆瀣堪充虛我自持盃酌阿母
誰能搔痒招麻姑髣髴不受皓雪變日月任使跳丸如
玄圃羅浮若邂逅擬出海嶽相歡娛

長江送別圖餞朱仲雅赴山西省幕

班馬歎江渚日夕羣山蒼對酒不能御愴念川途長朔
南自一統鴻燕不同翔別長會日短載歌燕燕章

朱澤民畫

朝朝謀隱地忽見好山川雄麗皆衡霍幽深別澗纏羊
眠松下石虹掛屋頭泉便欲抽簪去依崖結數椽

寄吳文明憲副

已過風雨節不得故人書目斷千山外神交五夜初繡
衣天下士白鷺使君車風采能廉懦知君獨起予

贈王彥和簡校還北平

提封開畫省地勢控全燕雪重陰山近星低瀚海連藩
屏歸付托畫諾仗材賢捫虱家聲舊應須有奏篇

連雨雜書二首

江雨殊未已江風生早寒今余悄不樂喟然起長歎決
去胡不早無營尚盤桓徒貽父母愁歲晏衣裳單

又

鬱鬱苦無聊起坐讀古書一篇未云畢感觸增嗟吁儀
秦為丈夫丘軻見謂迂是事古已然偃蹇欲何如

陪諸公郊行

忽憶兒童唱大堤便攜僚友出金閨清溪繞郭穿魚市

瘦馬尋芳踏燕泥酒美得辭花下醉詩成謾向竹間題
始知遊衍來應晚岸芷江楊色已齊

東齋夕書

幽居得自怡野性方愜素高枕一酣眠長廊獨閒步白
日誰云長青山忽已暮皓月照前階涼風滿高樹偶隨
孤鶴行時見踈螢度即此有餘歡何況山中去

絕句

落葉滿衡臯瀟瀟風雨夕一燈溪上明何處獨歸客

即日

午門同出獨歸遲
立斷銅壺漏下時
添得綠荷千萬柄
雨聲強半在西池

詣相府懇辭授職

玉署高寒切太清
不才那得冒恩榮
况兼多病無聊日
自合山林了此生

其二

塞上風塵晚不驚
將軍號令且休兵
秣田收後多為酒

早晚良家樂太平

到家

朝中久戀承軒寵膝下深慚反哺私
新荷君王賜骸骨
家人預喜占歸期

附汪廣洋詩

字朝宗高郵人封忠勤伯

朝日何曛曛

朝日何曛曛澄輝麗華嶼衆鳥欣已集
交交互鳴語緬懷當來遊旌麾戒炎暑
樓船渡烟霧弭節章江渚章渚

隘卑濕夕氣暝蒸雨偃仰憑危閣何以浣襟宇適茲涼
颺至高蟬振鳴羽清芬散川原微瀾動浦溆誰云披景
光寧不感時序獨立悵余懷馳思更延佇

壯遊奉東諸閣老

壯遊吳楚外揚舲邈天風名山浮紫翠大江走蛟龍歷
覽思超越毛骨生冰雪脫巾漉清湍舉手弄明月明月
懸青銅古人難再逢牛渚委陳迹蛾眉歛愁容九華舞
傚傚窺足滄溟底小孤立亭亭徘徊女蘿裏流宕番湖

湄峯巒愈出奇幽深構樓閣峭絕挂猿獼故意自陶寫
援筆灑秋泚神怪運宵冥魚鳥覺欣喜路逢丹丘生來
自赤霞城麻姑後飛鳥子晉迭吹笙湖光潋灩開雲壓
蒲萄綠狂引黃金壘笑歌紫芝曲左蠡素相得當湖忽
見迎揚瀾平一掌中有龜鼉行振衣扳鵲巢捫蘿踐苔
石厓氣凌空青松花墜階白舉首匡廬下調笑烟霞間
烟霞昔屢住今往幾時還叢蘭被路蹊芳草縈磻谷長
颺和鳴鸛迸泉驚飲鹿須臾面五老邀我山之陽授我

長生訣兼遺洞玄章問我從東來迢迢泛鯨波三山得
無恙十洲近如何旁招廣成子俯抱山中老鯉魚躍大
江鷁鸞下天沼待以青精飯酌以白玉漿乖龍蒼耳潤
吠犬靈苗香渴烏漸斂翼拭目增晚碧朶朶金芙蓉憑
虛落胸臆西南挺奇異江湖馳偉觀披掖古蘭若丹靈
耀巒岼嘗聞遠法師堅坐東林下還許陶淵明共結青
蓮社又聞李太白酷愛香爐峯長安却塵鞅欲歸巢雲
松往事既云遠顧我復來此濯泉坐樹陰下洗巢由耳

綠髮雙青童採芳留我行我行欲不行月高猿夜聲西
山招我遊明日過湖水笑隔南浦雲遙謝數君子

從軍樂

從軍樂右挿忘歸左繁弱天子有詔征不庭重選前軍
掃幽朔出門萬里不足平宛駒照耀黃金絡去年鏖戰
葱嶺東今年分戍蓬婆中蓬婆城外一丈雪半夜紫駝
號北風少年忽憶慷慨事便起酌酒澆心胸酒酣耳熱
聲摩空手舞三尺青芙蓉前將軍右都護壯士在榮不

在富一朝手格樓蘭歸人擁都門看馳騫朝承恩暮承
顧出入三軍稱獨步天子倚之安丞相倚為助都門富
見空萬數人生豈被從軍誤

遠遊陪師西征

朝發庾公樓夕叩滕王閣長歌奮激烈清風蕩寥廓張
帆江水秋伐鼓關月落予亦將遠遊明當造黃鶴

豫章南閣臨眺

章江澄夕景杞樹集涼颼疊閣連雲起凝笳帶月悲因

茲懷舊感登覽獨移時

月夜同諸友酌

休撥紫檀槽且傾黃濁醪涼天兼得月我輩復持螯彭蠡一杯大匡廬半壁高竹林瀟灑地應有醉山濤

登徐孺子亭

高士不可得茲亭幸爾留偶來逢暇日况復及清秋湖水當門落松雲傍枕浮幾時間歷覽乘月放扁舟

西掖聞鶯

粉署春已晚黃鸝時復鳴落花蕩輕吹繁木翳新晴好
語多聯續餘音入太清鳳凰池上客一曲送新聲

贛城水東

烟嶼水花淨風潭雲樹齊倒藤懸宿鳥絕壁掛晴霓岑
寂坐忘返空冥思欲迷塵纓如可澣予亦賦幽棲

嶺南道中

過盡梅關路灘行喜順流潯江元到海橫石不容輒嶺
樹垂紅葉汀沙聚白鷗從來交廣地還是古揚州

夜分

好雨滌煩暑夜分渾是秋沙明疑見雪月上可行舟涼
氣侵牀榻清風入柁樓浣花村裏客只合住滄洲

宿宣城山家

委曲疑無路幽深別有天偶披青嶂入得與白雲眠樹
密巢歸鳥溪迴響暗泉草堂終夜寂高枕聽鳴絃

夜直與架門藥秉德期孫伯融不至

雙立碧玉鉶對酌紫薇省長風吹翠梧初月下金井幽

懷鬱未開短髮醉慵整夜分羣籟沈牕虛燭花冷

送院判俞子茂進兵鄱陽

江東風日晴把酒送君行好慰三千士將收七十城烟
花催疊鼓雲騎擁連營山谷人爭喜殊方自此清

楊白花

楊白花爾何白蕩漾春心易南北嫩人深宮愁捧心擊
碎珊瑚為誰惜大江東流烟霧深欲往從之思如織

廣陵懷舊

官柳陰陰鎖汴橋暖催晴綠上蘭橈花迎後主依然在
人去東風不可招紫陌漸稀春試馬青樓殊絕夜鳴簫
回看烽火連雲起應使江淹笑寂寥

過胥江寄鄭叅政

浦口潮來穩放船汀花如雪草如煙幾家芳屋綠江水
一路松風響杜鵑簾捲輕寒中酒日香焚新霽熟梅天
少陵心事誰能識白首相知有鄭虔

對竹

我家湖水上長與竹為鄰今夜月明裏相看如故人

東吳曲

太湖茫茫水拍天吳儂只慣夜行船竹枝歌罷燈將滅
風雨瀟瀟人未眠

艇子搶風過太湖水雲行盡是東吳阿誰坐理青絲網
拾得松江巨口鱸

玻璃冷浸洞庭山雪竹攢青橘柚斑白首吳娃笑相語
官船不似釣船閒

畫槩經過碧浪湖水晶臺閣翠雲鋪藍田空老王摩詰
肯信江南有畫圖

過叢山關觀孫炎題筆

空翠深深啼竹雞叢山塞口日沈西數行大字光如漆
知是孫炎醉後題

嶺南雜錄四首

石鼎微熏茉莉香椰瓢滿貯荔枝漿木綿花落南風起
五月交州海氣涼

吉貝衣單木屐輕晚涼門外踏新晴相逢故舊無多語
解說邊爐骨董羹

誰跨鯨鯢斬斷虹海波飛立陣雲空閣婆真蠟船收澳
知是來朝起颶風

花覆禪房刻漏遲妙香浮動碧蓮池月明風細菩提落
想是南能出定時

過浦江縣

官樹冥冥啼早鴉雨晴山縣踏春沙誰家故宅無烟火

一葉松扉鎖落花

蘇溪亭

蘇溪亭上草漫漫誰倚東風十二欄燕子不歸春社晚

一汀烟雨杏花寒

淳安棹歌

淳安縣前江水平越女唱歌蘭葉青山禽只管喚春雨
不道愁人不願聽

江上

大山小山松樹齊千聲萬聲子規啼攬衣起舞夕露下
三更月落吳城西

象牙灘上百花開參差時復見樓臺翠香芹菜緣沙出
雪色鮭魚上水來

石倉歷代詩選卷二百八十九